

一傳一法要同卷

婆藪槃豆傳

龍樹菩薩為禪陀迦王說法要偈

漆八

婆藪槃豆傳

陳天竺三藏真諦譯

婆藪槃豆法師者北天竺富婁沙富羅國人也富婁沙譯為丈夫富羅譯為土毗搜紐天王世傳云是帝釋弟帝釋遣其生閻浮提作

王為伏阿脩羅其生閻浮提為婆藪提婆王之子有阿脩羅名因陀羅陀摩那因陀羅是帝釋名陀摩那譯為伏此阿脩羅恒與帝釋鬪戰謂能伏帝釋故有此名毗伽羅論解阿脩羅謂非善戲即應以此名譯之諸天恒以善為戲樂其恒以惡為戲樂故有此名亦得名非天此阿脩羅有妹名波羅頗婆底波羅頗譯為明婆底譯為妃此女甚有容貌阿脩羅欲害毗搜紐天故將此妹誑之以呪術力變閻浮提一處令陰闇其自居闇處不令人

見令妹別住明處語妹云若人欲得汝爲婦
汝可語云我兄有大力若欲取我必與我兄
相違若能將我兄鬪戰乃可相許毗搜紐天
後於明處見此女心大悅之問云汝是何人
答云我是阿脩羅童女天云諸阿脩羅女日

來皆嫡諸天我旣無婦汝又無夫今欲相取
得見從不女如其兄先言答之天云汝今惜
我身故有此言汝已愛我我豈相置我有大
力能與汝兄鬪戰女遂許之即爲夫妻阿脩
羅後往明處問毗搜紐天汝云何輒取我妹

爲婦天答云若我非丈夫取汝妹爲婦可致
嫌責我是丈夫無婦汝妹是童女無夫我今
取之正是其理何故見怪阿脩羅云汝有何
能自稱丈夫若是丈夫能將我鬪戰得勝當
以妹適汝天云汝若不信當共決之即各執
仗互相斫刺毗搜紐天是那羅延身斫刺所
不能入天斫阿脩羅頭斷頭即還復手臂等
餘身分悉爾隨有斷處隨即還復從旦至晚
斫刺不息阿脩羅無有死狀天力稍盡轉就
疲困若至夜阿脩羅力則更強明妃恐其夫

不如即取鬱波羅華擘爲兩片各擲一邊明妃於其中行去而復來天即解其意捉阿脩羅身擘爲兩片各擲一邊天於其中行去而復來阿脩羅由此命斷阿脩羅先就仙人乞恩願令其身若被斫刺即更還復仙人施其此恩故後時被斫刺而不失命仙人欲令諸天殺之故不施其擘身還復之恩故後時由此失命毗搜紐天既居此地顯丈夫能因此立名稱丈夫國此土有國師婆羅門姓嬌尸迦有三子同名婆藪槃豆婆藪譯爲天槃豆

譯爲親天竺立兒名有此體雖同一名復立別名以顯之第三子婆藪槃豆於薩婆多部出家得阿羅漢果別名比隣持跋婆比隣持是其母名跋婆譯爲子亦曰兒此名通人畜如牛子亦名跋婆但此土呼牛子爲犢長子婆藪槃豆是菩薩根性人亦於薩婆三多部出家後修定得離欲思惟空義不能得入欲自殺身實頭盧阿羅漢在東毗提訶觀見此事從彼方來爲說小乘空觀如教觀之即便得入雖得小乘空觀意猶未安謂理不應止爾

因此乘神通往兜率陀天諮問彌勒菩薩爲說大乘空觀還閻浮提如說思惟即便得悟於思惟時地六種動旣得大乘空觀因此爲名阿僧伽譯爲無著爾後數上兜率陀天諮問彌勒大乘經義彌勒廣爲解說隨有所得還閻浮提以己所聞爲餘人說聞者多不信無著法師即自發願我今欲令衆生信解大乘唯願大師下閻浮提解說大乘令諸衆生皆得信解彌勒即如其願於夜時下閻浮提放大光明廣集有緣衆於說法堂誦出十

七地經隨所誦出隨解其義經四月夜解十七地經方竟雖同於一堂聽法唯無著法師得近彌勒菩薩餘人但得遙聞夜共聽彌勒說法晝時無著法師更爲餘人解釋彌勒所說因此衆人皆信大乘彌勒菩薩教無著法師修日光三摩提如說修學即得此定從此定後昔所未解悉能通達有所見聞永憶不忘佛昔所說華嚴等諸大乘經悉未解義彌勒於兜率陀天悉爲無著解說諸大乘經義法師並悉通達皆能憶持後於閻浮提造大

乘經優婆提舍解釋佛所說一切大乘教第
二子婆藪槃豆亦於薩婆多部出家博學多
聞遍通墳籍神才俊朗無可爲傳戒行清高
難以相匹兄弟既有別名說故法師但稱婆
藪槃豆佛滅度後五百年中有阿羅漢名迦
旃延子母姓迦旃延從母爲名先於薩婆多
部出家本是天竺人後往罽賓國罽賓在天
竺之西北與五百阿羅漢及五百菩薩共撰
集薩婆多部阿毗達磨製爲八伽蘭他即此
間云八捷度伽蘭他譯爲結亦曰節謂義類

各相結屬故云結又攝義令不散故云結義
類各有分限故云節亦稱此文爲發慧論以
神通力及願力廣宣告遠近若先聞佛說阿
毗達磨隨所得多少可悉送來於是若人若
天詣龍夜叉乃至阿迦尼師吒諸天有先聞
佛說阿毗達磨若廣若略乃至一句一偈悉
送與之迦旃延子共諸阿羅漢及諸菩薩簡
擇其義若與脩多羅毗那耶不相違背即便
撰錄若相違背即便棄捨是所取文句隨義
類相關若明慧義則安置慧結中若明定義

則安置定結中餘類悉爾八結合有五萬偈造八結竟復欲造毗婆沙釋之馬鳴菩薩是舍衛國婆枳多土人通八分毗伽羅論及四皮陀六論解十八部三藏文宗學府先儀所歸迦旃延子遣人往舍衛國請馬鳴爲製文

卷八

五

句馬鳴旣至罽賓迦旃延子次第解釋八結諸阿羅漢及諸菩薩即共研辯義意若定馬鳴隨即著文經十二年造毗婆沙方竟凡百萬偈毗婆沙譯爲廣解製述旣竟迦旃延子即刻石立制云今去學此法人不得出罽賓

國八結文句及毗婆沙文句亦悉不得出國恐餘部及大乘污壞此正法以立制事白王王亦同此意罽賓國四周有山如城唯有一門出入諸聖人以願力攝諸夜叉神令守門若欲學此法者能來罽賓則不遮礙諸聖人又以願力令五百夜叉神爲檀越若學此法者資身之具無所短之阿踰闍國有一法師名婆娑須跋陀羅聰明大智聞即能持欲學八結毗婆沙義於餘國弘通之法師託迹爲狂癡人往罽賓國恒在大集中聽法而威儀

乖失言笑舛異有時於大集中論毗婆沙義
乃問羅摩延傳衆人輕之皆不齒錄於十二
年中聽毗婆沙得數遍文義已熟悉誦持在
心欲還本土去至門側諸夜叉神高聲唱令
大阿毗達摩師今欲出國即執將還於大集
中衆共檢問語言紕繆不相領解衆咸謂爲
狂人即便放遣法師後又出門諸神復唱令
執還遂聞徹國王王又令於大集中更檢問
之衆重檢問亦如先不相領解如此三反去
而復還至第四反諸神雖送將還衆不復檢

問令諸夜叉放遣出國法師既達本土即宣
示近遠咸使聞知云我已學得罽賓國毗婆
沙文義具足有能學者可急來取之於是四
方雲集法師年已衰老恐出此法不竟令諸
學徒急疾取之隨出隨書遂得究竟罽賓諸
師後聞此法已傳流餘土人各嗟歎至佛滅
後九百年中有外道名頻闍訶婆娑頻闍訶
是山名婆娑譯爲住此外道住此山因以爲
名有龍王名毗梨沙伽那住在頻闍訶山下
池中此龍王善解僧伽論此外道知龍王善

卷八

六

解欲就受學龍王恒變身作仙人狀貌住葉
屋中外道往至龍王所述其欲學意龍王即
許之外道採華滿一大籃頭戴華籃至龍王
所繞龍王一市輒投一華以爲供養投一華
作一偈讚歎龍王德龍王隨聞隨破其所立
偈義即取華擲外道其外道隨破隨立偈義
既立還投所擲華如此投一籃華盡且破且
救諸偈悉成就龍王既嘉其聰明即爲解說
僧佉論語外道云汝得論竟慎勿改易龍王
畏其勝已故有此說及其隨聽所得即簡擇

之有非次第或文句不巧義意不如悉改易
之龍王講論竟其著述亦罷即以所著述論
呈龍王龍王見其所製勝本大起瞋妬語外
道云我先囑汝不得改易我論汝云何改易
當令汝所著述不得宣行外道答云師本囑
我論成後不得改易不囑我於說論中不得
改易我不違師教云何賜責乞師施我思我
身未壞願令此論不壞即許之外道得此論
後心高很慢自謂其法最大無復過者唯釋
迦法盛行於世衆人多謂此法爲大我須破

之即入阿輪闇國以頭擊論義鼓云我欲論義若我墮負當斬我頭若彼墮負彼宜輸頭國王毖柯羅摩阿祇多譯爲正勤日王知此事即呼外道問之外道曰王爲國主於沙門婆羅門心無偏愛若有所習行法宜試其是非我今欲與釋迦弟子決判勝劣各須以頭爲誓王即聽許王遣人問國內諸法師誰能當此外道若有能當可與論義于時摩菟羅他法師婆藪槃豆法師等諸大法師悉往餘國不在摩菟羅他譯爲心願唯有婆藪槃豆

師佛陀蜜多羅法師在佛陀蜜多羅譯爲覺親此法師本雖大解年已老邁神情昧弱辯說羸微法師云我法大將悉行不在外道強梁復不可縱我今正應自當其事法師即報國王王仍剋日廣集大衆於論議堂令外道與法師論議外道問云沙門爲欲立義爲欲破義法師答云我如大海無所不容汝如土塊入中便沒隨汝意所樂外道云沙門可立義我當破汝法師即立無常義云一切有爲法剎那剎那滅何以故後不見故以種種道

理成就之是法師所說外道一聞悉誦在口
外道次第以道理破之令法師誦取誦不能
得令法師救之救不能得法師即墮負外道
云汝是婆羅門種我亦是婆羅門種不容殺
汝今須鞭汝背以顯我得勝於是遂行其事
王以三洛沙金賞外道外道取金布散國內
施一切人還頻闍訶山入石窟中以呪術力
召得夜叉神女名稠林從此神女乞恩願令
我死後身變成石永不毀壞神女即許之其
自以石塞窟於中捨命身即成石所以有此

願者其先從其師龍王乞恩願我身未壞之
前我所著僧伽論亦不壞滅故此論于今猶
在婆藪槃豆後還聞如此事歎恨憤結不得
值之遣人往頻闍訶山覓此外道欲折伏其
很慢以雪辱師之耻外道身已成石天親彌
復憤懣即造七十真實論破外道所造僧伽
論首尾凡解無一句得立諸外道憂苦如害
己命雖不值彼師其悉檀旣壞枝末無復所
依報讎雪耻於此爲之衆人咸皆慶快王以
三洛沙金賞法師法師分此金爲三分於阿

踰闍國起三寺一比丘尼寺二薩婆多部寺
三大乘部寺法師爾後更成立正法先學毗
婆沙義已通後爲衆人講毗婆沙義一日講
即造一偈攝一日所說義刻赤銅鑠以書此
偈標置醉象頭上擊鼓宣令誰人能破此偈
義能破者當出如此次第造六百餘偈攝毗
婆沙義皆盡一一皆爾遂無人能破即是俱
舍論偈也偈足後以五十斤金并此偈寄與
罽賓諸毗婆沙師彼見皆大歡喜謂我正法
已廣弘宣但偈語玄深不能盡解又以五十

斤金足前五十爲百斤金餉法師乞法師爲
作長行解此偈義法師即作長行解偈立薩
婆多義隨有僻處以經部義破之名爲阿毗
達磨俱舍論論成後寄與罽賓諸師彼見其
所執義壞各生憂苦正勤日王太子名婆羅
袞底也婆羅譯爲新袞底也譯爲日王本令
太子就法師受戒王妃出家亦爲法師弟子
太子後登王位母子同請留法師住阿踰闍
國受其供養法師即許之新日王妹夫婆羅
門名婆修羅多是外道法師解毗伽羅論天

親造俱舍論竟此外道以毗伽羅論義破法
師所立文句謂與毗伽羅論相違令法師救
之若不能救此論則壞法師云我若不解毗
伽羅論豈能解甚深妙義法師仍造論破毗
伽羅論三十二品始末皆壞於是失毗伽羅
論唯此論在王以一洛沙金奉法師王母以
兩洛沙金奉法師分此金爲三分於丈
夫國屬賓國阿踰闍國各起一寺此外道慙
忿欲伏法師遣人往天竺請僧伽跋陀羅法
師來阿踰闍國造論破俱舍論此法師至即

造兩論一光三摩耶論有一萬偈止述毗婆
沙義三摩耶譯爲義類二隨實論有十二萬
偈救毗婆沙義破俱舍論論成後呼天親更
共面論決之天親知其雖破不能壞俱舍義
不復將彼面共論決法師云我今已老隨汝
意所爲我昔造論破毗婆沙義亦不將汝面
共論決汝今造論何須呼我有智之人自當
知其是非法師先遍通十八部義妙解小乘
執小乘爲是不信大乘謂摩訶衍非是佛說
阿僧伽法師既見此弟聰明過人識解深廣

該通內外恐其造論破壞大乘阿僧伽法師
住在丈夫國遣使往阿踰闍國報婆敷槃豆
云我今疾篤汝可急來天親即隨使還本國
與兄相見諮問疾源兄答云我今心有重病
由汝而生天親又問云何賜由兄云汝不信
大乘恒生毀謗以此惡業必求淪惡道我今
愁苦命將不全天親聞此驚懼即請兄爲解
說大乘兄即爲略說大乘要義法師聰明殊
有深識即於此時得悟知大乘理應過小乘
於是就兄遍學大乘義後如兄所解悉得通

達解意既明思惟前後悉與理相應無有乖
背始驗小乘爲失大乘爲得若無大乘則無
三乘道果昔既毀謗大乘不生信樂懼此罪
業必入惡道深自咎責欲悔先過往至兄所
陳其愚迷今欲懺悔先誓未知何方得免云
我昔由舌故生毀謗今當割舌以謝其罪兄
云汝設割舌亦不能滅此罪汝若欲滅此罪
當更爲方便法師即請兄說滅罪方便兄云
汝舌能善巧毀謗大乘汝若欲滅此罪當善
巧解說大乘阿僧伽法師殂歿後天親方造

大乘論解釋諸大乘經華嚴涅槃法華般若

維摩勝鬘等諸大乘經論悉是法師所造又

造唯識論釋攝大乘三寶性甘露門等諸大

乘論凡是法師所造文義精妙有見聞者靡

不信求故天竺及餘邊土學大小乘人悉以

法師所造論爲學本異部及外道論師聞法

師名莫不畏伏於阿踰闍國捨命年終八十

雖迹居凡地理實難思議也

婆藪槃豆傳

龍樹菩薩爲禪陀迦王說法要偈

宋三藏法師求那跋摩譯

禪陀迦王應當知 生死苦惱多衆過

悉爲無明所覆障 吾欲爲彼興利益

譬如刻畫造佛像 智者見之宜恭敬

我依如來說正法 大王亦應深信受

汝雖先聞牟尼言 今若聽受轉分別

猶如華池色清淨 月光垂照踰暉顯

佛說六念當修習 所謂三寶施戒天

修行十善淨三業 離酒放逸及邪命